

tinæ terminos novit. Ferre non possum : Cl. Schannatum statim omnia immediate subijcere Fuldensibus, quæ illi pedibus tantum suis vel una vice tetigerunt. Nec jam adeo irascor Auberii insolentibus pro Gallia Rege editis Præensionibus, cum longe insolentiores a Schannato pro Ecclesia Fuldenfi excusas esse videam.

LIII. *Monasterium Rora* S. Michaeli dicatum *sub regimine Monasterii S. Bonifacii* constitutum fuisse Rabano Abbati Tradit: Fuld. cap. CCCXCI. hoc asserenti credo; sed Dioecesi ideo Wirceburgensi subtractum, nego. Situm enim erat in ditione Hennebergica et Pago Grapfeld. Et *Wolfgarius Episcopus* ibi *decimas*, Dioecesis signum, habuit, a quibus anno DCCCXV. *ad Rore* servos solum Abbatis Ratgarii exemit, ut ipse Cl. Schannatus in Buchonia vetere p. 398. agnoscit.

LIV. *Teutlebiense* in media Thuringia *Monasterium* Gertrudis quædam construxit et una cum bonis suis Ecclesiæ Fuldenfi donavit, voluitque ut post obitum suum in eo dignam Abbatissam constituerent Fuldenses. Regimini ergo iterum Fuldensium hoc Monasterium, nec tamen immediate submissum fuit. Nec Cl. Schannatus probat, id unquam Fuldenses recepisse.

LV. *Tulbam* locum antiquissimum esse agnosco. Jacebat in *Pago Salagevve*, ut Traditio Fuld. CVIII. anno 795. facta et aliæ demonstrant. Pagus hic in temporalibus Regi, in spiritualibus Episcopo Wirceburgensi suberat, ut jam dictum est. Tulbam speciatim ad Dioecesin Wirceburgensem pertinuisse evincit concessio Wolfgarii Episcopi de decimis quibusdam Ratgario Abbati anno 815. facta. In ea enim dicitur, dedisse Wolfgarium Ratgario, inter alias decimas, etiam eas *in villa quæ dicitur Munirihhasstat, quod constat ex suis propriis aratris, exceptis servorum suorum: simili modo in villa vocata Rootmulti; ad Bunahu, ubi Ecclesia edificata est; similiter in Tulba, ubi illa nova Ecclesia ordinata est.* Ratio igitur, cur decimas Wolfgarius Ratgario dederit, fuit, quod Fuldenses in bonis a piis sibi hominibus donatis ecclesias extrui curassent, aut ipsi extruxissent, ad quarum sustentationem aliquid decimarum concedi, æquum erat. Excipit tamen Episcopus servos in his locis suos, ex quo apparet, eum horum locorum non solum Episcopum, sed et dominum fuisse, si aliqua excipias, quæ ibi Fulda nacta erat. Sub Dioecesi igitur Wirceburgensi Tulba fuit, atque etiam sub dominio; et vestigia inde adhuc restant, quæ aliis demonstranda relinquo. Seriem Præpositorum Cl. Schannatus ubique sedulus pro viribus nobis patefacit. Sed vellem viros aliquos inter eos nobis designasset in Ecclesia, republica, aut studiis publice claros. Hæc enim annotari, cætera floccipendi merentur. Interea tamen symbola hic aliqua, licet non magni pretii, adjicienda est ejus catalogo Præpositorum. Dicit pag. 191. Erphonem Præpositum Tulbensem anno 1294. ab Henrico Abbate Fuldenfi facultatem obtinuisse de fundis clientelaribus, quos a Rudolfo et Conrado de Erthal fratribus recenter acquisiverat, pro lubitu disponendi. Addit, hujus Erphonis adhuc mentionem facere literas emphiteuticas annorum 1302. et 1307. Has non novi nec quid contineant, scio; habeo tamen in manibus autographas literas, quibus conventus in Tulba promittit, se cujusdam Bertoldi Prel obitus diem quotannis ob certa benefacta commemoraturum. Incipiunt: *Nos Rupertus Præpositus, Beatrix Abbatissa, totusque Sanctimonialium*